

**"Kenyataan Saya Tidak Pengaruhi Pemecatan Hasan Ali" - Azmin  
mStar Online**

**Januari 8, 2012**

**Oleh IWAN SHU-ASWAD SHUAIB**

**PETALING JAYA:** "Kenyataan saya tidak mempengaruhi pemecatan Hasan Ali," kata Timbalan Presiden Parti Keadilan Rakyat (PKR), Azmin Ali terhadap keputusan pimpinan PAS Pusat memecat Exco Kerajaan Negeri Selangor, Datuk Dr Hasan Ali sebagai anggota parti itu pada Ahad berkuat kuasa serta-merta.

Azmin berkata, perkara itu adalah keputusan yang dibuat oleh kepimpinan tertinggi PAS dan beliau tidak mencampuri urusan dalam menentukan keputusan berkenaan.

"Saya hormati keputusan yang dibuat. Dan saya percaya ia tidak akan menjejaskan Pakatan Rakyat.

"Sebaliknya ia memperlihatkan permuafakatan dalam Pakatan Rakyat bagi menghadapi persediaan dalam pilihan raya umum tidak lama lagi," katanya ketika dihubungi *mStar Online* di sini, Ahad.

Dalam kenyataan pada Ahad, Presiden PAS, Datuk Seri Abdul Hadi Awang berkata, pemecatan terhadap Hasan dibuat berdasarkan Fasal 82(9) perlembagaan PAS.

Azmin sebelum ini mendesak kepimpinan PAS supaya bertindak terhadap Hasan yang juga bekas Pesuruhjaya PAS Selangor kerana kritikan mengenai perhimpunan Bebaskan Anwar 901.

Menurut Azmin, beliau yakin dengan kebijaksanaan Abdul Hadi dan seluruh kepimpinan tertinggi PAS dalam menangani setiap masalah yang berlaku berkaitan dengan parti itu.

"Keputusan yang dibuat berdasarkan perbincangan antara mereka bersama dalam parti secara dalaman.

"Sekali lagi, soal Hasan dipecat hari ini tidak perlu saya campur tangan dan kenyataan saya tidak mempengaruhi (pemecatan itu).

"Bagaimanapun, saya menghormati keputusan yang dibuat oleh pimpinan tertinggi PAS," katanya lagi.

Hakcipta Terpelihara © 1995-2012 Star Publications (Malaysia) Bhd

Source:

[http://mstar.com.my/berita/cerita.asp?file=/2012/1/8/mstar\\_berita/20120108171944&sec=mstar\\_berita](http://mstar.com.my/berita/cerita.asp?file=/2012/1/8/mstar_berita/20120108171944&sec=mstar_berita)